

李文忠公奏稿

李文忠公奏稿

卷之七十七目錄

上海機器局請獎摺

光緒十九年六月十六日

奏保劉麒祥片

光緒十九年六月十六日

運送東三省軍火車價摺

光緒十九年六月十六日

包爾請給寶星片

光緒十九年六月十六日

奏保塔布囊希里薩拉片

光緒十九年六月十六日

請准接辦賑捐摺

光緒十九年七月初一日

賑捐酌增捐銀萬兩條例片

光緒十九年七月初一日

購運南米濟京片

光緒十九年七月二十六日

劉含芳兼管營務片

光緒十九年八月十六日

中俄接電請獎俄使片

光緒十九年八月十六日

博來請獎片

光緒十九年八月十六日

海防練軍請銷摺

光緒十九年八月十六日

展設新疆北路電綫摺

光緒十九年九月初十日

保送戴宗騫引

見片

光緒十九年九月初十日

大臣捐助晉賑片

光緒十九年九月初十日

請撥河運漕折預撥海運漕米摺

光緒十九年九月十二日

變通學藝期限片

光緒十九年九月二十六日

報效萬壽經費摺

光緒十九年十月十八日

蘆商報效銀兩摺

光緒十九年十月十八日

嚴禁聚眾掘隄摺

光緒十九年十月二十六日

重整上海織布局片

光緒十九年十月二十六日

淮軍報銷摺

光緒十九年十月二十六日

軍需交涉洋務片

光緒十九年十月二十六日

州縣墊辦兵差報銷摺

光緒十九年十一月十三日

林維源捐賑請獎摺

光緒十九年十一月二十四日

長蘆欠款展限摺

光緒十九年十一月二十四日

兩知府請付史館摺

光緒十九年十一月二十五日

宋永譽補祀昭忠祠片

光緒十九年十一月二十五日

察哈爾牛捐請獎摺

光緒十九年十二月十二日

機器局報銷摺

光緒十九年十二月十二日

奏保朱靖旬等片

光緒十九年十二月十八日

湊撥搶修近省隄河經費摺

光緒十九年十二月十八日

永定河籌辦拋甄法片

光緒十九年十二月十八日

李文忠公奏稿卷七十七

全集一之七十七

桐城吳汝綸編錄

上海機器局請獎摺

光緒十九年六月十六日

奏爲上海機器局創造西洋新式鎗礮卓著成效有裨軍需照章擇尤請獎恭摺仰祈

聖鑒事伏查光緒十二年七月海軍衙門奏定變通保獎章程內開如有奇才異能創製軍械由該督撫考驗明確卽破格懇恩錄用又十四年八月海軍衙門奏定北洋海軍章程內開各機器局所造大小新式鎗礮與外洋所造一律准擇其尤爲出力者照異常勞績酌保等因均經欽奉

懿旨依議欽此欽遵各在案近日泰西各國以鎗礮之利爭雄角勝日異月新現新出之連珠快鎗及全鋼快捷大礮尤爲行軍守

口利器快鎗之製以奧之漫利夏鎗德之新毛瑟鎗爲最後出而最精其快礮則從前各洋廠僅能造三磅六磅小礮嗣英之阿摩士莊廠多方考究造成四十磅子大快礮爲各國所推重爭先購置臣鴻章前以上海機器局所造鎗枝均是舊式仿造英廠新式南夏鎗亦不適用因於十六年秋開飭令專就漫利夏新毛瑟鎗兩式講求仿造該局總辦道員劉麒祥覓得兩項鎗枝並購阿摩士莊快礮一尊遂件拆卸認真考驗督率廠員華洋匠目悉心仿造竭兩年之力將鎗礮先後造成經該廠演試能與西洋所造新式一律於上年九月間派員齎送來津臣鴻章委派軍械局道員張士珩會同各營將領督同洋教習分日逐細考察驗得該鎗膛綫六條子路甚準開放裝退極爲省手每分鐘放快自二十二出至二十五出距靶二百碼能洞穿一分五釐厚鐵板並擊入後而

松木一寸四分每秒速率四百八十九密達堅緻靈捷與德國新  
毛瑟相等其速率綫路更端漫利夏之上又驗得該礮用全鋼套  
箍製造隨礮鋼子計重四十五磅用德廠配造經遠來遠快船最  
堅厚之鋼面鐵甲爲靶能受擊力較尋常鐵甲三倍彈子竟能深  
入三四寸其速率均數六百二十九密達每分鐘可放子十二出  
子彈出腔準頭極好與大沽海口購用阿摩士莊快礮出數相同  
臣鴻章覆加察驗以上兩項鎗礮並能與外洋最新之式一律精  
利洵爲難能可貴當飭逐漸推廣仿造以資利用至鎗礮所需鋼  
料購自外洋價值既昂運費又貴該員等復仿照西法鍊成純鋼  
捲成礮管鎗筒並大小鋼條精純堅實與購自外洋者殊惟現  
購礮座僅有三噸者一具出鋼尙不能多將來經費漸充添購機  
器增置廠屋就中產之煤鐵鍊西式之鋼料多製新式器械以備

各營領用不必取資外洋實爲自強根本至計其有裨於軍實者誠非淺鮮竊維泰西各國鎗礮之學俱係專門名家或世代相傳以臻極詣或逐年改作以集眾長每一器成其國家必重加賞擢特示旌異故能才藝競奮利器日新日本蕞爾小邦於鎗礮一事猶能竭力經營其所製造幾與西洋相埒中國地大物博獨以囿於風氣限於財力未能與彼爭長遇事仰給他人原非久遠之策醇賢親王有鑒於此故於海軍衙門章程內一再奏請特懸此格以勵羣才規慮至爲深遠上海機器局爲各省製造最大之廠該局員等苦思力索不憚繁難奮勉圖功竟能於數年之間創造新式鎗礮與西洋最精之器無異爲中國向來所未有今年五月間日本陸軍中將川上操六游歷來津試放此鎗動色歎羨謂彼國中村田大廠所造殊不能及乞取兩枝以爲標準是該局員等創



製軍械實能與外洋一律與海軍衙門奏定保獎之例相符自應據實

上聞籲乞

恩施以勵成勞而策後效除劉麒祥一員另片陳請外所有在事委員補用知縣江蘇試用縣丞劉家傑江蘇試用縣丞劉毓湘劉殿華成希縉李永淵陳其壽均擬請免補本班以知縣仍留原省歸候補班補用補用知州候選布經懋馮祖壽擬請免選本班以知州儘先選用候選縣丞李華張信璫均擬請免選本班以知縣儘先選用上九員均係最爲出力始終勤苦該局分廠十餘處承辦數百人經臣等再三核減所保僅止此數實屬無可再刪所擬官階仍未敢優於常格仰懇

天恩俯准照擬給獎足以振興軍實鼓勵人才謹合詞恭摺具陳

伏乞

皇上聖鑒訓示再此摺係由臣鴻章主稿合併陳明謹  
奏

奏保劉麒祥片

光緒十九年六月十六日

再二品頂戴江蘇候補道劉麒祥於光緒十五年夏閒委辦上海機器局到局之初卽以創造新式鎗礮及自鍊鋼料爲己任西國新出利器不以祕法示人其機括靈巧異常猝難臆測開辦之始幾無端緒可尋該員久在外洋究心製造故能精選洋匠博訪窮探考索成式參以心得督飭員匠銳意仿造無間寒暑造成試驗稍不如法輒復拆改於兩年之內盡羣材之用竟能造成新式鎗礮並鍊就鋼料經臣等疊次考驗與西洋所造一律精堅有志竟成實非始願所及該員爲故陝西撫臣劉蓉之子志行著聞前經臣紀澤奏調出洋派充駐法參贊十年閏五月

特旨派赴江南隨同曾國荃辦理事件旋經左宗棠奏調隨赴福建總理營務歷經左宗棠曾國荃穆圖善楊昌濬及臣坤一先後

保薦均奉

旨交軍機處存記其人才可用久在

聖明洞鑒之中此次創辦鎗礮尤能力任其難於軍實攷工裨益甚大自應援照海軍衙門奏定章程奇才異能創製軍械准予破格錄用之例奏乞

恩施該員虛銜實職並無可加查吉林機器局道員宋春鼇於上年八月經將軍臣長順奏保請以海關道記名請

旨簡放仰蒙

特恩允准在案劉麒祥資勞較深所造新式軍器爲中國向來所無尤非尋常製造可比應如何破格錄用之處出自

慈施特沛謹合詞附片陳請伏乞

聖鑒訓示謹

矢

武蔵野

江

運送東三省軍火車價摺

光緒十九年六月十六日

奏爲順直各州縣運送東三省軍火等項車價難以常例相繼請  
照關外成案造報恭摺仰祈

聖鑒事竊前因東三省創辦防務領運神機營海軍衙門軍火餉  
鞘等項關係重要順直經過各州縣墊雇車價准銷無期關外州  
縣接運此項車價向准作正開銷關內事同一律未便獨令向隅  
經臣於光緒十六年奏請自是年起凡出京至山海關經過州縣  
運解東三省練兵餉鞘軍火墊辦車價等准其各歸各任按照每  
起實用數目造冊咨部核銷在於司庫地糧項下撥給歸墊業蒙  
聖恩俞允並經戶部覆准在案嗣據藩司將各州縣光緒十六年  
墊應過銀一萬五千八百三十兩七錢九分九釐十七年墊應過  
銀一萬八千五十七兩七錢二分九釐分年造冊詳經臣先後咨

部核銷現准兵部咨復按冊開程途里數以定例每車每百里給銀一兩之數核計浮多三四倍及四倍七分零不等礙難核准行令刪減再行核辦等因經臣飭據藩司詳稱各州縣運送東三省邊防軍火餉鞘因事關重要隨到隨運必須按照民間市價從優發給方免貽誤前因挪墊賠累甚鉅奏准各歸各任按照每起實用數目造銷是此項車價已聲明實用實銷難以常例相繩茲兵部飭令按照例價核刪各州縣實賠累不堪該藩司前在奉天府尹任內稔知關外州縣報銷前項車價向按每車每百里請銷銀三兩五分零歷奉兵部奏明准銷有案關內事同一律請照關外成案辦理以免向隅卽此尙須賠貼應飭令扣補俾示限制等情詳請具奏前來臣查各州縣運解東三省邊防車價前因墊雇市價較例價賠累甚鉅是以奏明按照每起實用數目造報今部駁

仍按例價核刪實難遵辦惟關外接運前項車價向按每車百里  
准銷銀三兩五分有奇關內事同一律自應畫一辦理除通飭各  
州縣按照三兩五分之數核刪造報外合無仰懇

天恩飭下兵部查照立案以憑造報理合恭摺陳明伏乞

皇上聖鑒訓示謹

奏



包爾請給寶星片

光緒十九年六月十六日

再北洋武備學堂鐵路總教習德國工程師包爾經該國克鹿卜  
廠派令來華講求鐵路藉圖報效自光緒十六年到堂教授鐵路  
各項課程盡心指示不憚煩勞俾學生均能領會頗著成效三年  
之久並未支領薪水實屬廉讓可風現擬銷差回國合無仰懇  
天恩俯准將包爾照總教習例

賞給二等第三寶星以示獎勵如蒙

允准即由臣照式製給並咨總理衙門繕發執照理合附片陳請  
伏乞

聖鑒訓示謹

奏

奏保塔布囊希里薩拉片

光緒十九年六月十六日

再准直隸提督臣葉志超咨稱喀拉沁王旗記名協理世襲四品塔布囊希里薩拉於光緒十七年十月間教匪倡亂之初卽帶領蒙兵會合鄉團扼要堵剿其時逆氛甚熾圖竄建昌縣街踞以爲巢該員率領兵團在建昌迤東之他里巴營子一帶與賊力戰奮勇異常擊斃賊首楊茂林並緝斃賊黨數百名賊不得逞退踞喀拉沁窪一帶相持旬日大軍始陸續到齊當時若非該員力扼要衝遏賊西竄則建昌必爲賊踞官軍進剿難免牽掣之虞其勞績實不可泯肅清後該員奉本旗調回差遣營中於彙獎時無從查悉銜名本旗又以該員曾經隨營助剿疑已開保亦未核獎竟至遺漏此次葉志超出口巡閱道經他里巴一帶土人述及往事皆極稱該員血戰之功且惜其有勞未錄應補請奏獎等因前來臣

查上年勦平教匪在事出力將士皆已優獎該蒙員同一出力膽

識兼優實爲出色之員未便獨令向隅仰懇

天恩俯准將記名協理世襲四品塔布囊希里薩拉

賞戴花翎以昭激勸理合會同直隸提督臣葉志超附片具陳伏

乞

聖鑒訓示謹

奏

請准接辦賑捐摺

光緒十九年七月初一日

奏爲順直各屬水災甚重工賑需款浩繁懇懇

天恩俯准接辦賑捐以資接濟恭摺仰祈

聖鑒事竊查順直各屬本年伏雨過多河水漫溢窪區被淹業將大概情形馳奏在案恭讀六月十五日

上諭京師近日以來雨勢連綿不止十二日復大雨滂沱連宵達旦誠恐河流驟漲近畿一帶禾稼受傷著直隸總督順天府尹查明各屬被災之處妥籌賑撫迅卽馳奏等因欽此昨又蒙特恩截留奉天粟米江蘇江北河運漕糧分撥賑濟仰見聖慈軫念災黎有加無已

詔書下逮薄海同欽茲據各屬陸續稟報被災州縣三十餘處順屬以大興宛平良鄉涿州通州武清香河寶坻東安霸州甯河順

義爲最而房山保定文安薊州永清固安次之直屬以天津靜海  
新城雄縣蠡縣安州灤州高陽玉田等處爲最而博野定興任邱  
肅甯獻縣青縣饒陽次之此據文報已到者而言其餘驛路淹阻  
尙未知被災輕重至各河漫口如永定大清南運北運瀦龍潮白  
子牙鳳河灤河等處隄岸沖缺壩埽墊陷漫沒多處上下千數里  
巨浸汪洋幾無乾土近日天雖晴霽而盛漲驟難宣洩平地尙有  
水深丈餘及數尺者災重地方房屋坍塌禾稼漂沒小民無地可  
種無屋可棲蕩析流離岌岌不可終日據稟報卽督飭司道  
分派委員馳往查辦急撫酌撥銀米核實散放其被水圍繞村莊  
則令紮筏濟渡搭廠收養暫救目前之急惟自秋徂冬爲日方長  
水勢既未消落晚不斷難補種約計冬賑春賑及堵築各河漫口  
工程非預籌有著之款源源接濟斷難措手查上年順直復被水

災經 奏請開辦賑捐仰蒙

恩准在案計自光緒十八年七月十六日接准部文之日起除去封印日期扣至本年八月十六日一年限滿現在災重費繁款無所出再四籌商惟有仍將賑捐展限一年接續勸辦或可稍資濟助據籌賑局司道詳請核奏前來臣查本年順直水勢之大災區之廣實較十六年爲尤甚直隸爲缺額之區災歉頻仍庫儲支絀而

畿輔重地民生疾苦上廑

宸念不得不多方籌畫力圖補救籲懇

聖恩准將現辦賑捐自本年八月十六日限滿後再行接展一年所有章程條款悉照前案辦理其捐銀萬兩請旨給獎一條已月片奏懇

恩施准予收辦藉資鼓舞統自接辦之日起予限一年限滿卽行  
停止所收捐款隨時會商順天府戶分別災區輕重酌量勻撥惟  
各省物力已窮賑捐久成弩末此次展限接辦係於無可設措之  
中冀收寸效將來捐數能否踴躍殊無把握臣惟有竭力招徠廣  
爲勸募總期多集一分之款卽災民多受一分之惠儻款不敷用  
再由司局各庫隨時設法籌湊以濟急需所有順直等處水災甚  
重籌款維艱仍請接辦賑捐藉資賑撫緣由謹恭摺由驛馳

奏伏乞

皇上聖鑒訓示遵行謹  
奏

賑捐酌增捐銀萬兩條例片

光緒十九年七月初一日

再查光緒十六年順直地方被水災重賑繁戶部議准開辦賑捐於常行捐例之外酌增捐銀萬兩請旨給獎一條上年夏間直省復遭水患經臣奏開賑捐仍請援案收辦仰荷

聖慈允准嗣於十二月間接准部咨以春融伊邇賑務較緩於前所有捐銀萬兩優獎一條奏請先行停止奉

旨依議欽此欽遵知照前來維時春賑尙未就緒而以工代賑之處需款尙多旋又欽奉

寄諭飭籌山西邊外賑款來源驟短竭蹶萬分因部臣甫經議停未便遽行續請騰挪應付實已力盡筋疲方冀年穀豐稔民困稍蘇即可依限停捐無如夏間淫雨兼旬水勢之大較十六年爲尤



甚災賑情形已於請展賑捐摺內詳細陳明惟查順直賑捐開辦多年各省勸募至再至三凡有可設法之處無不羅掘殆盡即使竭力招徠而所收祇銜封貢監零星湊集爲數無幾仍恐不足濟事當此億萬災黎嗷嗷待哺非有大批捐款源源接濟溝壑餘生斷難存活近來俱億浩繁中外度支同虞不給未敢請撥部帑致令籌畫爲難臣督同司道再三籌議並與各省督撫臣往返電商均以賑捐優獎一項必須照案收辦方可稍資鼓舞卽戶部當日酌將此條亦深知外間集款維艱非此不足以收速效近畿密邇京師根本所繫非他省情形可比賑需至要民命至重不得不廣籌拯救之方合無籲懇

天恩俯准將捐銀萬兩請

旨給獎

一條仍照光緒十六年成案

一體收辦出自

慈施逾格此因賑款緊急萬不得已爲一時權宜之計應俟賑務稍鬆限期屆滿卽行停止以示限制理合附片陳請是否有當伏

乞

聖鑒訓示施行謹

奏

購運南米濟京片

光緒十九年七月二十六日

再欽奉本年七月初四日

寄諭給事中余聯沅奏京城糧價日昂請設法平糶一摺近畿一帶大雨過多河水漫溢田禾被淹以致京師糧價日昂小民日食維艱允宜早為籌畫著孫家鼐孫楫趕緊設法籌款平糶所需南米並著李鴻章設法運京以資接濟等因欽此臣查六月間淫雨兼旬各河漫決平地水深丈餘順直災象之重較十六年為尤甚京城糧價昂貴窮民乏食必須招商運米糶賣藉平市價十六年曾飭招商局道員黃建筦選募正派米商購運向米赴京平糶辦法極為妥善飭循舊辦理府尹來電意見亦復相同旋據該道招得股商在津陸續湊集大米雜糧源源運京以應急需惟天津產糧無多向須取給南省上年蘇皖一帶秋成僅稱中稔糧價增

於平時商人販運北來加以應完釐稅成本已重無利可圖來源日少畿境連年荒歉民間本乏蓄藏此次復患沈災以致市僧居奇米糧日貴不得不廣籌采運接濟民艱已分飭津滬關道並招商局出示招商速赴江南江北產米素豐之區采買米石航海北來多多益善分起運京以資平糶應如該給事中所奏由臣發給護照沿途經過關卡一體免完釐稅如須酌發運本卽由籌賑局設法接撥利之所在商販爭趨將見南米來源日旺京津市價自平於貧民生計大有裨益除分別咨行查照飭遵外理合附片覆

陳伏乞

聖鑒謹

奏

劉含芳兼管營務片

光緒十九年八月十六日

再山東登萊青道劉含芳於十八年五月奉

旨調補斯缺該道自北洋辦理海防即派駐奉天旅順口綜理水  
陸營務會辦船塢及各礮臺工程創設魚雷營操練雷艇添設水  
雷學堂分建水陸師需用鎗礮器械藥雷子彈各庫均能認真督  
籌條理精密旅順與煙臺對峙爲北洋門戶要衝尤爲海軍根本  
之地臺陽廠庫各工甚關重要該道艱難締造歷年最久經手事  
件最多茲已逐件清釐就緒由臣遴派妥員接管並咨明山東撫  
臣飭赴本任現值籌辦煙臺膠州防務添築礮臺與旅順大連灣  
威海衛南北聲勢聯絡登萊青道常駐煙臺兵輪駛赴各口均尙  
便捷應仍飭該道兼管營務於地方公事之暇隨時就近周歷各  
處會商各將領整頓工操實於海防全局有裨理合附片陳明伏

乞  
聖鑒  
謹  
奏

中俄接電請獎俄使片

光緒十九年八月十六日

再中俄議接海蘭泡瑯春等處陸路電綫始於俄國前任使臣庫滿因丹國阻撓未能定議嗣俄國續派使臣喀希呢來華復申前說准總理各國事務衙門來咨經臣飭派總辦電報事宜調補津海關道盛宣懷再與商訂接綫條約當會議之始彼此各圖利益兩不相讓各國多懷嫉妒從旁唆阻加以中俄陸綫接通有礙英丹兩國海綫權利更多牽掣喀希呢兼充丹使亦覺左右為難乃竟能自始至終力持原議仍按照庫滿底本商酌變通頗為平允所訂接綫條約十款業經臣咨商總理衙門奏准於光緒十八年七月先在天津畫押並

奏請蓋用

御寶彼此互換在案現在海蘭泡水綫已於本年六月初二日接

通璉春陸綫亦於七月初四日接通照章遞報據津海關道盛宣懷詳請將該使臣喀希呢等奏獎前來臣查海蘭泡璉春水陸兩綫既已接通遞報此後中俄陸綫出洋之電報皆由丹英海綫出洋電報內分其電利爭執必多喀希呢兼充丹國使臣於議訂接綫條約持平理論不致意存偏袒其參贊闊雷明隨員巴福羅福亦均能和衷襄理克底於成洵屬兩有裨益電綫既經互接將來電務交涉甚繁自應酬具先事之勞以策後來之益可否仰懇天恩准將俄國駐京使臣公爵喀希呢照世爵例

賞給頭等第三寶星署參贊前代理使臣闊雷明照代理公使例賞給二等第三寶星隨員巴福羅福照正使隨員例

賞給三等第一寶星以示獎勵除俟奉

旨允准後臣卽分別照式飭製咨送總理衙門轉給並由總理衙



門結給寶星執照一併照會俄使外理合附片具陳伏乞  
聖鑒訓示謹  
奏

博來請獎片

光緒十九年八月十六日

再電報總局洋員丹國人博來係大北公司所用旋又辭退光緒十年經盛宣懷招致到局凡與各國交涉電務常令隨同參酌忠於所事悉協機宜此次襄辦中俄接綫尤能殫心竭慮不辭勞怨洵屬異常出力現在俄國使臣喀希呢等經臣月片請

賞寶星該洋員係電局募用之人出力較多未便沒其勞勩查該洋員已於東三省造綫出力案內奏蒙

賞給三等第一寶星此次可否仰懇

天恩賞給該洋員博來三品頂戴藉資鼓勵理合附片陳請伏乞

聖鑒訓示謹

奏

海防練軍請銷捐

光緒十九年八月十六日

奏爲查明天津海防練軍光緒十八年分收支各款照章造冊請銷恭摺仰祈

聖鑒事竊據天津支應局司道詳稱天津練軍及大沽葛沽北塘海口各礮臺防營並雲字營馬隊營務處小隊應需餉項向由津海關六成洋稅招商局稅洋藥釐捐東海關協餉長蘆鹽斤復價正雜課各項內隨時籌撥樽節支放嗣因東海關六成洋稅湊付洋債無款協解改在天津釐捐項下動用經部覆准業將光緒十七年以前收支款目疊次奏咨准銷在案所有十八年津防各營隊應支廉俸公費餉乾薪糧等項並大沽北塘各海口礮臺經費以及設局辦公租賃民房添置帳棚旗幟號褂采買製造軍火子藥悉照奏定章程歷年准銷成案核實支放茲造具光緒十八年

分收支細數清冊詳請

奏咨前來臣遂加覆核自光緒十八年正月起到年底止舊管項

下實存銀二千三百二十二兩零新收各款並本案扣收平餘共銀四十萬八千一百二十兩零開除支款悉照定章毫無浮濫應歸戶部核銷銀三十七萬一千五百八十兩零工部核銷銀三萬七千一百七十九兩零合共銷銀四十萬八千七百六十兩零應存銀一千六百八十二兩零已支發十九年餉項列入下屆滾接造報其奉部核准歷年墊支不敷銀二萬一千一百七十八兩零仍於冊內列報俟另案核辦所有光緒十八年天津海防練軍收支餉銀請銷緣由除清冊咨部外理合恭摺具

奏伏乞

皇上聖鑒敕部核銷謹

奏

展設新疆北路電綫摺

光緒十九年九月初十日

奏為籌辦展設新疆北路電綫以速邊報而竟全工恭摺仰祈  
聖鑒事竊臣於上年十一月間奏請接辦新疆省城及喀什噶爾  
電綫聲明伊犁電綫再行續議接展查新疆巡撫駐紮迪化為天  
山南北兩路總匯之區南抵喀什噶爾為提督所駐北抵伊犁為  
將軍所駐並是極邊重鎮與俄羅斯及各回部英國屬境三面接  
壤交涉之事日繁南北兩路情形均極重要亟應分設電綫以期  
消息靈通惟以道路綿長需費較鉅祇可分段籌辦前因帕米爾  
界務未定南路邊報尤急是以先議接辦喀什噶爾一路現迪化  
電綫已於六月間竣工喀綫尅期趨辦如一切應手冬閒計可蒧  
事邊外設綫以運料為最艱伊犁北路勢須展設即應乘此接續  
趕辦可省再舉之煩臣與陝甘督臣楊昌濬新疆撫臣陶模往返

電商意見相同並接陶模電稱迪化至伊犁官路一千五百里捷路可一千一百餘里運木之費約二萬餘兩以後迪喀伊三處養綫經費每年約一萬五六千兩均應由新疆籌備至歲修綫料仍須多為購儲等語當即督同總辦電報事宜津海關道盛宣懷詳細籌議此次迪喀兩路電工經費並運購料物係按照驛路估計現經逐段量勘乃知關外道里較內地稍為短縮該員等極力撙節料費兩項尚有存餘計由迪至伊捷路一千一百餘里即就存餘之料為展接之需惟運料愈遠腳價愈昂經費恐有不足通盤詳核短細尙屬無多但料物繁賾設有要件不敷應付無從購覓便須停工以待且設綫之後仍須籌備歲修自應將一切用料從寬估計運往存儲不致臨時支絀臣查所擬辦法甚為核實料物均出節省款項無庸多籌此綫接成則新疆南北兩路一氣貫注

全局皆靈更無偏而不舉之患於邊防大局深有裨益趁此封凍之前飭令剋日添購料物陸續運往一俟喀綫工竣卽接續趕辦委員匠役俱係熟手不須另調事半功倍並由新疆撫臣照案分飭沿途營縣預爲采購木料按里分屯以備取用各項經費核實動支如有不敷月行籌給事竣彙案報銷其購運木料及常年養綫修理等費應由新疆撫臣專案具奏外所有籌辦接展伊犁電綫緣由謹會同陝甘督臣楊昌濬新疆撫臣陶模合詞恭摺具陳伏乞

皇上聖鑒訓示謹奏



保送戴宗騫引

見片

光緒十九年九月初十日

再三品銜候選道戴宗騫於光緒十年閏五月經前會辦北洋事宜今湖南撫臣吳大澂專摺保奏奉

上諭吳大澂奏遵旨保薦人材各摺片戴宗騫著俟經手事件完竣後送部帶領引見等因欽此旋經臣派赴山東威海衛辦理海防創造礮臺上年臺工辦竣復經吳大澂奏明就近由臣給咨赴部奉

硃批著照所請吏部知道欽此臣查戴宗騫籍隸壽州久在臣軍襄辦營務嗣經吳大澂調赴吉林辦防統領綏軍旋又調防畿東沿海一帶十三年兼統鞏軍移防威海衛督修南北岸礮臺結構精嚴壁壘一新操練新式鎗礮水雷均極嫻熟足資戰守臣於十七年八月校閱海軍案內以該員志趣廉正經濟宏通文武兼資

深堪倚任附片奏保奉

硃批著交軍機處存記欽此伏查近年各省保送引

見人員多因勞績敘保戴宗騫係經吳大澂以人材特薦與尋常勞績保案不同且海內承平日久文員知兵者已少一旦設有緩急深慮驅使乏人臣追溯咸同之交用兵二十餘載卒賴文員收功則及時儲備將帥之才尤爲要務戴宗騫久歷艱苦親臨行陣忠實果毅曉暢戎機歷辦海防兼通洋務尤爲文員中不可多得之選現在威海防務布置略定自應遵照前奉

諭旨給咨赴部引

見應如何錄用之處

朝廷自有權衡非臣所敢擅擬除俟赴引事竣仍令回防襄助外理合附片陳明伏乞

聖諭  
奏

大臣捐助晉賑片

光緒十九年九月初十日

再本年二月間欽奉

諭旨以山西邊外災情甚重飭令籌款派員協賑等因遵經督飭籌賑局司道勸集捐款派委山東候補知州潘民表等馳往確查散放業將辦理情形集捐數目先後陳奏在案茲據籌賑局司道詳稱內有大學士臣額勒和布等會同各部院大臣倡率京外官紳共捐京平松江銀一萬六千四百二十五兩零除撥交辦賑京紳翰林院修撰黃思永三千五百兩外餘均分批匯津解交潘民表等兌收散放並據聲稱前項捐款均毋庸核獎請奏明立案前來臣查此次晉邊猝遭奇荒待賑孔亟該大學士等情切救災捐資倡率南北義賑各紳聞風響應用能集成鉅款濟助要需全活災黎無算實屬功德及民力顧大局所捐銀兩雖稱不敢邀獎而

其公忠愷

國之忱亦未便壅於

上聞除俟查明收支實數再行開單奏銷外理合附片陳明伏乞

聖鑒敕部查照謹

奏

請撥河運漕折預撥海運漕米摺

光緒十九年九月十二日

奏為順直水災過重冬春賑撫需款甚鉅援案變通辦理籲懇  
天恩賞撥江蘇江北河運漕折銀兩並預撥江蘇明春海運漕米  
以濟要需恭摺仰祈

聖鑒事竊查本年順直地面大水為災各河漫溢被淹州縣四十  
餘處民情困苦異常仰荷

特恩截留本屆江蘇江北河運漕米十萬石奉天粟米一萬四千  
石並准展辦賑捐以資接濟業將籌辦賑撫情形疊次陳奏在案  
伏查此次畿境水勢之大受災之重為近年所未有應賑戶口不  
下數百萬前蒙

恩賞漕米順直兩屬均勻分派外並將各省解到捐項及司局撥  
款隨時籌付現正遴派委員會同各該州縣確查戶口以備接放

冬賑刻下各屬高地水漸消退明春雖可種麥然收成總在四五  
月青黃不接爲日甚長窪區積水驟難涸復更無麥收可望冬賑  
之後必須接辦春賑方免委填溝壑至各河漫口如南運北運永  
定大清子牙潞龍潮白等河險工林立除永定河堵口大工另請  
撥款修辦其餘均須擇要趕緊堵築明歲春融並應挑濬河身加  
培隄岸俾附近災民藉以備趁餬口統計工賑兩項需款浩繁不  
敷甚鉅直隸本缺額之區豐年度支尙虞不給況值災歉頻仍羅  
掘殆盡各省賑捐祇能應一時之急日久斷難爲繼此外別無款  
項可籌順直切近

京師夙蒙

加惠今飢黎嗷嗷待哺望

澤尤殷臣等目擊災情不得不爲求雨綢繆之計溯查光緒十年

十三十四十六等年均因水災奏蒙

恩准截留南漕辦理賑撫十七年春撫案內並蒙

賞撥海運漕米十六萬石本年順直災況較前數屆爲更重自應

援照成案仰乞

恩施惟南省海運漕米到津約在三月驗兌剝運輟轉需時冬賑  
實難濟用查江蘇江北每年籌辦河運漕米各十萬石均於秋冬  
之交由辦漕州縣徵解折價分赴產米之區采買兌運本年收成  
豐稔冬漕自必照辦現擬乘該省未經采買之先籲懇

天恩賞撥江蘇江北來年應解河運漕米各五萬石

飭下該督撫臣將前項漕折銀兩迅速核明提解所有隨漕輕齎  
茶果箇兒錢等項及由蘇運津由津運通剝價運費並經剝耗食

米石請



旨照歷屆成案飭由各該糧道按照米數核扣撥解津貼賑需如此變通辦理在南省毫無出入而順直得此款項及時散放冬賑足濟急需裨益大局非淺抑更有請者本屆災區過廣民困甚深明年春賑必須寬爲籌備現請酌折銀兩仍恐不敷應用擬懇恩准預撥江蘇海運漕米八萬石俟明春運抵天津就近截留其隨漕輕解餉兒錢等項並由津運通耗米運費亦照案一併核解以資接濟約計蘇省起運米數較多於京倉尙無所損以上兩項銀米解到後順直仍當各半分撥由臣等督飭印委各員核實妥辦不准稍有弊混如蒙

俞允應請

特旨宣示則

恩出自上益足固民志而廣

皇仁所有籌辦冬春賑撫請撥江蘇江北河運漕折銀兩並請預撥明存江蘇海運漕米各緣由臣等爲拯救民命起見是否有當理合會同兼管順天府府尹臣孫家鼐順天府府尹臣孫楫恭摺由驛具陳伏乞

皇上聖鑒訓示施行謹奏

變通學藝期限片

光緒十九年九月二十六日

再查總理海軍衙門奏定海軍章程摺內聲明章程容有未備及臨時應行變通者隨時酌擬具奏等因欽奉

懿旨允准在案茲據北洋海軍提督丁汝昌呈稱章程內原定駕駛學生在堂習業四年畢業派上練船學習船藝一年送回學堂再習三月然後撥入鎗礮練船再學三月考校如式派歸兵船差遣補用等因查學習船藝鎗礮原定期限太促學習甫得門徑即改肄別業恐有未精難免功虧一簣當日海軍創設在在需材欲其速成以供驅策故不能寬予限期現在天津學堂學生日增威海學堂學生亦將畢業又有北京內學堂學生將次上船人材不患不多惟在力求精選擬變通舊章將京津兩學堂學生畢業後卽先派入鎗礮學堂學習六箇月考校如式分別等第填給執照

再派上康濟練船學習魚雷水雷各種技藝六箇月考校給照然後派上威遠練船學習船藝並令隨船廣歷東南洋一帶考究風濤沙綫寬限兩年俾臻精進其春秋考校仍照章分別等第統以三年爲期諸藝學畢彙集各照擇其最優者以千總候補次者以把總候補加儘先字樣如此量爲變通年限稍寬藝業必更精到且分班上船學習亦免擁擠之虞其威海學堂學生本已兼習鎗礮仍照定章辦理等情呈請核辦前來臣查鎗礮船藝極難精熟欲究其精微之奧必寬以學習之期該提督所擬變通辦法較原限計寬年半爲時亦不過久而學生藝業更可精益求精自爲因時制宜期收實效起見於造就海軍人材不無裨益除咨海軍衙門兵部立案外理合附片陳明伏乞

聖鑒訓示謹

奏

報效

萬壽經費摺

光緒十九年十月十八日

奏為

天恩仰祈

聖鑒事伏念來歲恭逢

慈禧端佑康頤昭豫莊誠壽恭欽獻皇太后六旬萬壽普天同慶  
薄海騰歡中外臣工咸思勉效微誠共襄

盛典恭查乾隆年閒歷次恭辦

慶典成案中外諸臣呈請祝

嘏均經奏明請

旨遵行前准戶部咨開總辦

萬壽慶典王大臣等會奏中外臣工報效工需酌擬分交數目一  
摺奉

旨依議欽此又准戶部咨開內務府會奏分段點設景物一摺聲  
明如有增添之處再行奏辦等因又在京王公及閣部九卿先後  
奏請

恩賞地段點綴景物經壇其中叩祝奉

旨准交內務府辦理等因欽此竊維京外事均一體邦畿地冠九  
州臣久領封疆近依

殿陛受

恩至渥被

澤最先應偕衢巷之歌謠上頌

宮闈之福祐現辦工段若須添設原擬經費或有不敷查乾隆二  
十六年大學士傅恒等奏明各段點景交納銀數職名單開各省  
督撫每省交銀三萬兩仰惟

先朝俯允疆臣呈進銀兩固有

成憲昭垂臣謹率同直隸提鎮司道等於王大臣前次奏定報效

經費分交數目外敬遵成案再籌集銀三萬兩以備添設地段點

綴景物之需顯懇

賞收俾得各獻忱莫名抃舞再查傳恒等原奏稱外省督撫向  
俱派員來京該員等辦料鳩工均非素所熟悉以至辦理周章而  
糜費亦不可枚舉請仍由該大臣等總司大事等因現在外省各  
員於京中應辦事宜尤多隔膜合無仰懇

天恩俯准將此項銀兩仍

飭交內務府辦理無庸各省派員前往以期妥慎而杜虛糜所有  
遵照成案續請報效經費緣由理合會同兼管順天府府尹臣孫

家鼐順天府府尹臣孫楫恭摺具陳伏乞



奏  
皇上聖鑒訓示施行謹

蘆商報效銀兩摺

光緒十九年十月十八日

奏爲長蘆鹽商報效銀兩恭摺仰祈

聖鑒事竊臣准戶部咨開辦理

萬壽慶典王大臣等會奏明歲恭逢

慈禧端佑康頤昭豫莊誠壽恭欽獻皇太后六旬萬壽率士臚歡

查乾隆年間各省鹽商皆有捐輸款項由督撫奏明請

旨准其報效此次各商如有照案陳請者應由各督撫奏明請

旨遵辦等因奉

旨依議欽此欽遵咨行到直當經轉飭遵照茲據長蘆鹽運使季

邦楨詳稱據綱總商人楊俊元王守善等聯名稟稱商等世沐

湛恩躬逢

景運欽惟

慈禧端佑康頤昭豫莊誠壽恭欽獻皇太后昌辰介祉

周甲延祺

治鞏金甌

闡澤覃敷於八表

輝騰玉券嘉祥翕集於

萬年固已慶治寰區況復近依畿甸商等業同煮海情切歌衢側

聞布綵

天街欣覩雕梁之耀日竊願節觀

京邑助成蠶棟之迎雲雖庀料鳩工非云稔冒而獻芹呈曝冀竭

愚忱謹公捐銀十萬兩稍效壤流之細藉據獎藎之殷請轉詳具

奏等情前來

臣查蘇綱引目多滯商務久疲並蒙

聖恩優加調劑停引既寬其期限積欠更緩夫催科縣力稍紓眾

情同感所捐銀兩委係出於至誠合無仰懇

天恩准其報效如蒙

俞允卽飭運司令該商等將所捐銀兩呈繳運庫聽候委解內務

府兌收辦理謹繕摺具陳伏乞

皇上聖鑒訓示謹

奏

嚴禁聚眾掘隄摺

光緒十九年十月二十六日

奏為直隸沿河居民聚眾掘隄以鄰為壑嚴定地方官疏防處分恭摺仰祈

聖鑒事竊准軍機大臣字寄光緒十九年九月初二日奉

上諭本日據孫家鼐孫楫奏文安大城兩縣士民因安州匪徒扒隄被淹來京呈控一摺並據鴻臚寺卿劉恩溥陳奏該二縣民人呈訴情形大略相同匪徒聚眾挖隄情殊可惡著李鴻章派委大員馳往該處查勘確情嚴拏匪犯照例懲辦並妥籌辦法詳定章程不准以鄰為壑貽害民生至災民恃眾構訟儻查有倡勒同行等事即將為首之人嚴拏懲辦以儆刁風等因欽此臣查本年六七月間大雨兼旬大清河潞龍拒馬等河水勢盛漲奔騰下注又因永定河南上汎漫口渾流竄入清河宣洩不及穿越南隄匯歸

西淀水勢愈漲愈高沿淀居民廬舍田禾盡淪巨浸七月十一日  
夜淀民聚眾將任邱縣某隄地面之千里隄偷挖決口二道疊飭  
清河道潘駿德嚴拏匪犯搶堵口門旋將該決口於八月十四日  
堵築合龍而挖隄之犯尙未就獲又添派候補道衛杰前往會同  
訪拏懲辦至下游之文安大城被水各村糧租早已停徵又從優  
籌給賑撫體恤不爲不周乃竟結隊成羣赴京構訟顯有奸民逼  
迫同行已飭將爲首之原告宮變等傳案解省訊辦俟究明確情  
再行酌懲竊維直境沿河各處地多低窪每遇盛漲卽被淹浸小  
民不安義命挖隄洩水貽害鄰封其罪固不可寬然使地方官實  
力緝防認真緝辦何收輕於嘗試欲使沿河無挖隄之犯其責成  
仍在於官查挖決河防圩岸律有盜決故決之分盜決者罪止杖  
一百徒三年故決者罪止杖一百流三千里因而殺傷人者盜決

則滅鬪殺傷二等故決者以故殺傷論其有抗拒巡兵挖隄決口  
糜帑害民情節較重者例內雖無作何治罪明文查有道光十二  
年南河龍窩汛十三堡奸民陳端等強挖官隄分別擬以斬絞成  
案可援立法本已周備定例亦極森嚴直隸獄眾挖隄之案多係  
上游被淹移害下游或因河淀盛漲移害隄外民田地方官勘驗  
查辦若係縣屬之民盜決本境之隄提犯嚴懲辦理尙易其有界  
分兩縣一經扒挖此縣受害向彼縣提犯而挖隄奸民往往混推  
村眾承認無人卽嚴訊地保鄉長非以衅起一時狡飾卽以黑夜  
人多無從辨認爲詞爲首及幫同扒挖之犯每至無從拏解辦理  
殊多掣肘地方官事前疏於防範失事以後又以挖隄之犯俱係  
被淹情急可憫之民類多酌量示懲從寬了結以致愚民益無顧  
忌紛紛效尤此直隸沿河居民一經水淹動輒聚眾挖隄之積習

也臣督同臬司周復悉心核議嚴禁挖隄不在多設治罪科條而在嚴定疏防處分應請嗣後直隸奸民聚眾挖隄之案除首從各犯仍分別按律定擬毋庸設科條外其疏防挖隄之地方官但經決口過水漂沒田禾財物者如將案內幫同扒挖及聽從糾人等犯拏獲過半兼獲首犯按律懲辦免其議處其有獲犯尚未及半及首犯在逃未獲者卽照盜案以失事之日起扣限四箇月題參疏防四參不獲將承緝州縣印汛官降一級調用該管府廳道均照盜案督緝兼轄統轄之例議處如有殺傷多命者從重照致斃多命之例查辦儼係兩縣交界鄰提人犯仍按隔屬關提人犯例以文到之日爲始限二十解如逾限不獲照隔屬關提命盜等案重犯分別擬以罰如此嚴定處分庶各州縣自顧考成咸知警戒遇案認真眾挖隄之風可期漸



熄矣所有遵議緣由是否有當理合恭摺具陳伏乞  
皇上聖鑒訓示謹  
奏

重整上海織布局片

光緒十九年十月二十六日

再臣於光緒八年因華商稟請分招商股在於上海設立機器織布局以華棉紡織洋布酌輕成本抵敵洋產當經

奏准變通稅釐專章在案上年復派紳商添籌資本建廠開機每日夜已能出布六百疋銷路頗暢正擬推廣紡紗漸收利益乃據江海關道稟報九月初十日該局清花廠起火適值狂風施救不及廠貨被焚當即派員會查所剩基地局房估價攤派惟查洋貨進口以洋布洋紗爲大宗光緒十八年洋布進口值銀三千一百餘萬兩洋棉紗進口值銀二千一百餘萬兩中國出口絲茶價值不能相抵布縷爲民間日用所必需其機器所紡織者輕輟勻淨價值尤廉故遠近爭購豈知多銷一分洋貨卽少用一分土產是以因勢利導不得不用機器仿造必使所紡之紗與洋紗同所織

之布與洋布同庶幾華棉有銷路華工有生機華商亦沾餘利此  
事斷難中止亦難緩圖應仍在上海另設機器紡織總局籌集款  
項官督商辦以爲提倡並釐訂章程號召華商多設分廠以資推  
廣方可以土產敵洋貨力保中國商民自有之利權謀始圖成得  
人尤難臣查津海關道盛宣懷歷辦輪船招商局及各省電報局  
皆有成效於商務洋務尙肯苦志研求現值津河將封關權事簡  
擬派令暫行赴滬會同江海關道蒞緝柴商明前辦紳商將前局  
妥爲結束截清界限分籌資本一面規復舊局一面設法擴充俟  
該道等籌辦稍有頭緒隨時續  
奏除札委候補道黃建筦暫行代理津海關篆外所有上海織布  
局派員續籌辦法以敵洋產而保利權緣由理合附片具陳伏乞  
聖鑒謹

奏

淮軍報銷摺

光緒十九年十月二十六日

奏為光緒十八年分淮軍收支款目列為第二十一案造冊報銷  
繕單恭摺仰祈

聖鑒事竊照淮軍收支款項業經截至光緒十七年十二月底止  
列為第二十案報銷於光緒十八年十月二十八日具奏奉

硃批該部議奏單併發欽此旋准部復按冊核銷在案伏查淮軍

分駐直隸沿海各口並奉天之旅順口大連灣山東之威海衛等

處計護衛親兵武毅仁盛銘楚護軍親慶馬步水師共五十一營

同水陸各哨棚併護運餉械弁勇統歸淮軍案內造冊彙總請銷

今自光緒十八年正月截至是年十二月底止列為第二十一

案所有統領營哨官弁員名勇夫開收總數駐防處所先經造冊

分咨軍機處暨戶兵工部備查又將支給正雜款項增裁數目遵

照新章每三箇月開報一次咨送各部查核其淮軍馬步水師各營並隨營辦事支應等差文武官弁親兵勇夫薪費口糧倒補馬匹柴薪車價駝騾餵養卹賞水陸轉運價腳夫工采辦製造用款油艖船隻經費犒賞正雜各款均循前案楚軍營制與奏定章程歷屆准銷例案分別截清起止所開銀數概按湘平折實庫平接續造報飭據淮軍報銷局司道逐款清釐查核舊管銀三十七萬二千八百一十七兩一錢有奇新收銀二百四十八萬八千一百五十四兩七錢有奇登除並附銷銀三十八萬一千六百八十四兩六錢有奇開除正雜等項遵照部議酌定軍需報銷章程各歸各部核銷計應歸戶部核銷銀二百萬六千四百三十八兩四分有奇應歸兵部核銷銀三萬三千二百三十九兩九錢有奇應歸工部核銷銀七萬八千五百六十二兩四錢有奇統共請銷銀二百

十一萬八千二百四十兩四錢有奇應截存銀三十六萬一千四十六兩八錢有奇已接支光緒十九年正月起淮軍馬步水師營哨正雜餉項並購製中外軍火器械工價預儲軍米等項動放無存歸於後案舊管項下滾接造報等情具詳請

奏前來臣查淮軍各營分駐直隸天津大沽北塘蘆臺至山海關沿海一帶並奉天之旅順口大連灣山東之威海衛各海口等處修築礮臺擇要扼守練習後膛鎗礮水雷魚雷各新法采用西洋利器講求制勝機宜俾北洋全局固若金湯聲威既張敵情自懾實爲消患無形之計各營分布海疆千餘里內衛

京畿門戶外控藩屬鄰邦有事得資應援餉項乃計口授食之需必須按期給發歷屆報銷案內截存銀兩皆係設法節縮並將月餉酌量緩欠誠以北洋海防關係重大無時敢忘戰備不得不稍

留餘地藉應急需現計欠餉仍有一百五十九萬一千二兩有奇  
若將截存銀兩儘數抵補不敷甚巨況次年各軍食米須先期發  
價赴南省購運方免臨時缺誤此項米價向在截存項下酌撥近  
因各省關額解淮餉短少往往入不敷出遂至截存銀兩動放無  
存惟有隨時諄催實力籌解免遇事束手所有造報十八年正  
雜款項均係循照歷屆准銷成案撙節支發實用實銷並無絲毫  
浮冒除分造細冊咨送各部核銷並將以後用款接續造報外理  
合專摺具陳並繕簡明清單恭呈

御覽伏乞

皇上聖鑒謹

奏



軍需交涉洋務片

光緒十九年十月二十六日

再准軍海防各營洋鎗礮隊教習人等辛工礮費輪船新糧並購買洋軍械價值運解礮火輪駁各船水腳及天津行營機器製造局委員等薪糧公費工匠工食料物購價等項多與洋人交涉無例可循至操練後膛洋礮拉礮車馬餵養夫工係照奏定章程倒補馬匹例價分別核實支給業將截至光緒十七年十二月底用款附片

奏銷在案伏查此次造報光緒十八年正月起截至是年十二月底止第二十一案內前項各款遵照新章將增裁支用數目彙入季報清冊先後咨部立案茲據該司道等按款復加查核均係照案接續支給並奉文飭發毫無浮冒遵章將支用款目各歸各部核銷計應歸戶部核銷教習人等薪糧公費匠工拉礮馱運車馬

餵養等銀十一萬三千二百七十四兩四錢有奇應歸兵部核銷  
輪船薪糧夫工船價運腳保險費倒補馬價等銀三萬六千一百  
八十五兩六錢有奇應歸工部核銷油飾小修礮費購置外洋各  
項料物器具價值等銀四萬六千六兩一錢有奇共計請銷銀十  
九萬五千四百六十六兩二錢有奇照案分晰月造支銷細冊詳  
請附

奏前來臣查前項淮軍各營洋鎗礮隊教習通事工匠人等辛工  
購買外洋物料價值運腳各款多與洋人交涉無例可循仍應查  
照歷屆成案據實請銷除將細冊咨送總理衙門戶兵工部核銷  
外伏乞

聖鑒謹附片具  
奏

州縣墊辦兵差報銷摺

光緒十九年十一月十三日

奏爲查明直隸各州縣供應光緒十年起至十二年止兵差墊用銀兩照章報銷恭摺仰祈

聖鑒事竊查光緒九年十二月准兵部咨核覆直隸各州縣供應兵差酌議報銷章程應將冊開廩給跟役馬匹等項浮多者刪除凡遇應付兵差支給馬匹不得再付車輛如有應付車輛亦不得再支馬乾其車輛雇價按照定例開銷不得再有守候外銷名目帶勇各官以及勇丁原營支給薪糧公費沿途不得再行應付廩給口糧且勇營均有長夫尤不應另給跟役車輛致涉重複等因當經行司核明刊章移行各屬一體遵辦業將光緒七年至九年各州縣供應兵差銀兩奏報並造冊咨部准銷在案茲據藩司裕長將直屬各州縣光緒十年正月起至十二年十二月底止供應

兵差墊用銀兩查照例案新章分別准駁刪減按起聯站詳細句稽安細核造計供應調撤官兵暨運送軍火餉械及采買戰馬等差共請銷車價船價緯夫口糧實銀二萬九千四百九十八兩八錢六分八釐官兵廩給口糧實銀九百一十一兩九錢七分四釐官兵房價實銀一千九百八十九兩六錢九釐馬差乾折棚廠賃價實銀三千八百七十六兩七錢五分以上共請銷實銀三萬六千二百七十七兩二錢一釐又補銷光緒八年運送軍火車價實銀三十一兩六錢統共各款請銷實銀三萬六千三百八兩八錢一釐內例銷車價照例核給全銀其船價緯夫口糧廩給口糧馬乾棚廠遵照停票章程改給六成實銀房價一項各州縣均於官兵到站時向民間重價租賃較例定價銀多至數倍現均按照例價造報應請查照例銷車價一律核給實銀俾免賠累並請俟奉部

准銷後在於兵差經費項下分別核明撥給歸墊未奉准銷以前  
不准先行列入交代作抵以免虛懸而昭核實其應飭查各起差  
務俟查覆到日歸於下屆報銷案內核辦等情具詳前來除飭將  
各項報銷總冊詳咨戶兵工部查照外理合恭摺具陳伏乞  
皇上聖鑒敕部核銷謹  
奏

林維源捐賑請獎摺

光緒十九年十一月二十四日

奏爲大員疊捐賑款爲數甚鉅懇

天恩俯准援案給獎恭摺仰祈

聖鑒事竊查本年二月間山西邊外七廳因旱成災欽奉

諭旨飭臣協籌賑撫旋據二品頂戴辦理臺灣墾撫事宜太僕寺

卿林維源捐銀二萬三百兩六七月順直大水又捐銀二萬七千

六百兩先後解到兌收轉撥濟賑並據該京卿以受

恩深重情殷報效不敢仰邀獎敘等情由籌賑局司道詳請核

奏前來臣查林維源前因屢次捐助軍需鉅款仰邀

恩獎洊擢京卿每遇各省水旱偏災無不慷慨好施捐貲濟助卽

現辦臺灣墾撫事宜常年需用經費不下數萬兩亦皆自行捐辦

公忠體

國海內所稀本年晉直兩省猝被重災需款孔亟正值連年勸捐  
物力疲敝之餘累寸積銖尙難籌集該京卿兩次捐銀四萬七千  
九百兩全活災黎無算實屬志切救民功能濟眾有裨大局匪淺  
雖據聲稱不敢邀獎而捐數較鉅未便壅於

上聞該京卿係現任三品大員階銜均無可加自應照例准其移  
獎查光緒十六年順直水災浙江烏程縣廩貢生候選郎中龐元  
濟捐賑銀三萬兩十八年江甯等處旱災廣東南海縣貢監生周  
長華捐賑銀三萬兩經臣及兩江督臣先後奏蒙

特旨賞給舉人准其一體會試欽遵有案今林維源之子候選知  
府監生林爾嘉讀書敦品有志上進可否仰懇

天恩俯准援照龐元濟周長華成案

賞給舉人准其一體會試以昭激勸出自

特恩里亦知科第爲士子進身之階本不應破格陳請特以林維源獨捐賑銀至四萬七千餘兩之多好義樂輸實非尋常所有且捐數較龐元濟等尤鉅皆蒙

恩准所請既是勵急公嚮上之忱亦無慮援引冒濫之弊是否有當理合恭摺陳請伏乞

皇上聖鑒訓示謹  
奏



長蘆欠款展限扣

光緒十九年十一月二十四日

奏爲長蘆補欠積欠二款勢難補徵仍請照案推展五年以紓商力恭摺仰祈

聖鑒事竊查長蘆應徵補欠積欠二款係嘉慶道光以前參商欠項於道光二十八年清查案內議令現商按引攤交前因商累已深奏准自同治十三年起停徵五年嗣於光緒四年十年十四年三次奏准推展各五年在案扣至十九年十二月限滿據鹽運使季邦楨詳稱現值時艱帑絀多籌一分進款卽多濟一分之用此項補欠積欠但可設法啟徵斷不任藉詞請緩惟自道光二十八年增定科則以後又加徵復價加價等款核計每引交款過多商力已形竭蹶加以直晉災賑疊捐巨款及公捐報效京餉又不下數十萬金更屬筋疲力盡且直豫引岸疊遭災歉鄭州決口之後

民氣未復而順直各屬連年大水銷數日形壅滯本年北河決口水道淺阻京商引鹽多未抵岸落廠陸運所費彌多商情極窘若再將遠年參商舊欠責令代還其力萬難支拄必致有礙現課據通綱商人瀝情籲請推展該司詳加體察不得不從緩議徵請照案自光緒二十年起展限五年俟限滿再行察酌核辦等情具詳前來臣查現課本較舊欠緊要必先顧現課庶無誤京協各餉近年災歉頻仍眾商於運銷艱絀之時仍竭誠輸捐巨款應完正雜引課近數屆又係照額全完實屬勉力輸將勢難責令再還舊欠應懇

天恩准如所請辦理體恤商艱所有長蘆補欠積欠二款仍難補徵請照案再展五年緣由理合恭摺具陳伏乞

皇上聖鑒訓示謹

英

兩知府請付史館捐

光緒十九年十一月二十五日

奏爲已故知府政績卓著遺愛在民籲懇

天恩宣付史館恭摺仰祈

聖鑒事據天津縣在籍紳士前湖南興甯縣知縣劉錫九等聯名呈稱已故天津府知府鄒振岳於光緒十五年由宣化調任天津地處衝繁竭力整頓清釐積案政聲卓然郡中錢買巧偽百出認真釐剔積弊一清商民稱便津沽地勢窪下頻年患水辦理賑務親歷查勘核實散放全濟尤多兼辦守望各局嚴拏積匪地方綏靜平時聽斷明決如理家事纖悉無遺循行各縣請求政教吏畏民懷十八年夏閒南運河水勢盛漲衝冒風雨竭力搶護東隄賴以保全本年查辦子牙河工甫旋又以南運河驟漲馳往搶辦奔走烈日中感受暑邪因病出缺聞者均爲感泣又據宣化縣在籍

紳士五品職銜閻文瑞等聯名呈稱已故宣化府知府章洪鈞光緒十二年到任邊郡文風樸樸藏書最少該故守捐廉購辦經史及關係掌故政治等書二千餘卷置書院中暇日與諸生講解討論宜人始知嚮學居庸關清路爲南北衝途蒙部之朝貢臺站之轉運俄商之販茶皆取道於此往來苦其嶮巇該故守稟定商捐章程分別等則遞年興作一律坦平商旅頌德縣屬之蛇腰嶺地當要隘夏秋洋河泛溢輿騎艱行該故守勸捐集款別治道三段以避危險百八十日而工成行者稱便屬縣義倉年久滋弊分飭收令撤換紳董示以豐歉糴糶之宜認真舉辦親往抽查倉儲充實荒歉有備至今利之聽斷不尙威刑遇有案關風化倫紀必諄諄導諭咸知感服訟獄寢息平時勸諭士民尤以禮教廉恥爲先從前演會冶游之風因之中止習俗一變其他如罷各署之私徭

減行縣之供頓清查奸宄整頓郵政凡有益於地方之事無不舉行前後所頒條教居民皆能傳誦聞其卒也巷哭野祭遠近相屬先後由各官紳臚敘事蹟詳請奏乞

恩施宜付史館等情前來臣查鄒振岳於同治四年由庶吉士散館改官直隸八年經前督臣曾國藩甫蒞畿疆首以整飭吏治爲務舉劾屬吏最爲精嚴所舉各員其後或遷擢他處或中道凋謝獨鄒振岳由牧令歷官郡守在直隸三十餘年歷時最久所至有聲尤善治盜於饒陽嚴辦砍刀會於清苑整辦積匪套白狼及劉德沛悍黨於易州整辦大猾趙老尙等案並赫然在人耳目在津四年治水辦災殫竭心力竟以炎暑防河致疾不起尤爲津人之所哀思章洪鈞於光緒七年由編修經臣奏調來直深知其操履清嚴志趣遠大言論規畫皆平實可行臣曾再疏保薦蒙

恩飭放宣化府知府抵任後察其治行眞能力踐其言不爲赫赫之名而所設施皆卓然有古循吏風軌身歿之日士民感念至今不衰代章洪鈞者卽鄒振岳宣人追述循績必以二守並稱謂章洪鈞以德化而鄒振岳以才顯相繼爲政邇郡數十年所罕見也

伏讀同治三年

上諭祁雋藻奏引盜安民必資循吏請分別表彰一摺嗣後各省大吏務宜加意訪查其有政績官聲遺澤在人者奏明宣付史館編入循吏列傳等因欽此光緒五年原任臺北府知府林達泉廬州府知府李炳鴻七年原任揚州府知府何金壽疊經前兩江督臣沈葆楨左宗棠奏請

宣付史館立傳奉

旨允行鄒振岳章洪鈞居官政聲與林達泉等相埒而畿輔列郡

尤爲政教之先自應舉其尤異者加之表揚以示風勵今據該紳士等牘陳籲請足見遺愛未泯公論允孚合無仰懇

天恩俯准將已故知府鄒振岳章洪鈞生平事蹟

宣付國史館列入循吏傳以彰治行而順輿情除將該員等事實冊繕分咨外理合恭摺具陳伏乞

皇上聖鑒訓示謹

奏



宋永譽補祀昭忠祠片

光緒十九年十一月二十五日

再永年縣故官宋永譽前明崇禎壬午科舉人

國朝定鼎入都謁選授陝西郿縣知縣在任遇難罵賊不屈死

追贈陝西按察司僉事廕一子入監讀書廕恩騎尉世職載在邑

志查該縣舉人李蔚然於同治二年任定番州知州遇賊殉難得

旨賞給恩騎尉世職入祀本籍昭忠祠宋永譽與李蔚然守土捐

軀事蹟相同李蔚然已於同治十二年入祠附祀宋永譽尙屬缺

典該縣紳耆請援李蔚然之例在於本籍昭忠祠設位致祭呈由

府道轉咨藩司具詳前來並查各直省昭忠祠建於雍正二年用

祀立功致命諸臣宋永譽服官授命之時在未建昭忠祠以前是

以未列祀典現經查明事蹟與人祀之例相符合無仰懇

天恩俯准將宋永譽附祀本籍昭忠祠以慰忠魂理合附片具陳

伏乞

聖鑒訓示謹

奏

察哈爾牛捐請獎摺

光緒十九年十二月十二日

奏爲察哈爾內外各旗羣滿蒙官員兵民捐助耕牛援照歷屆成案酌請獎敘繕單恭摺仰祈

聖鑒事竊照張家口內外地方因上年秋閒嚴霜早降禾苗枯萎顆粒無收被災村莊二百餘處民間牛馬宰賣殆盡必須設法籌備以資耕作據口北道吉順以察哈爾所屬滿蒙官民牧養蕃盛尙可捐助牛隻會商察哈爾都統及旗羣官員均各樂從派員設局勸辦分撥應用援照成案每牛一隻核合實銀十四兩請俟事竣從優給獎經臣於光緒十九年二月初二日附片陳奏奉硃批著照所請該衙門知道欽此茲據該道吉順查明察哈爾內外各旗羣滿蒙官員兵民一百九十一員名共捐牛三千八百九十九隻已飭委員隨收隨解撥發災區分給有地無力貧農領用

正值冬麥布種之際得此濟助獲益匪淺迨具各該捐生銜名清冊請援案奏獎等情前來臣查光緒四年直隸河閒等府旱災察哈爾各旗羣捐助耕牛經臣奏請援照蒙古節次報捐駝馬成案核給獎敘仰蒙

恩旨允准部議謂其凡與成案相符或比照成案不甚懸殊者均准一律給獎誠以該處旗羣蒙古向隸外藩近年情形苦累而能慨分畜產惠及農氓故獎勵特從優異此次捐助耕牛至三千八百九十九隻之多實屬好義急公於救荒要政深有裨益既非內地勸捐可比亦與別項捐輸不同自應各按捐數援照節次奉准成案從優核獎謹繕清單恭呈

御覽仰懇

天恩俯准照擬給獎以昭激勸理合恭摺具陳伏乞

皇上聖訓示誦  
奏

機器局報銷摺

光緒十九年十二月十二日

奏爲天津機器局光緒十七年分動用經費照章造冊報銷恭摺  
仰祈

聖鑒事竊照天津機器局經費奏明動撥津海東海兩關四成洋  
稅截至光緒十六年止業將收支款目造冊奏報經部核復准銷  
並將十七年支給薪工等款分別咨部立案茲據該局前福建藩  
司張夢元等將十七年分應行造銷各冊分晰開報計上屆存銀  
十一萬六千九百二十三兩有奇本屆十二箇月共收四成洋稅  
招商局船稅並江海關洋藥釐金海防支應局解到添造栗藥鋼  
彈經費津海關解到添購栗藥機器經費及各省撥還軍火等價  
銀四十二萬一千五百七十二兩有奇共支銷銀三十一萬六千  
四百十九兩有奇應存銀二十二萬二千七十六兩有奇業經定

購外洋器料並添建工程應歸付清價腳及工竣之年報銷所有  
本屆應銷各款仍照向章各歸各冊計全案收支總數及員弁司  
事工匠夫役人等薪工爲第一冊購辦物料續建工程及核付保  
險運腳等項爲第二冊收支物料分項造報用存物料作爲光緒  
十八年分舊管爲第三冊製成軍火撥發各項爲第四冊撥給各  
船薪糧物料及行營製造局用料爲第五冊神機營撥用物料爲  
第六冊安設

頤和園電燈並運解海軍衙門各項料物腳價等項爲第七冊其  
製造軍火仍照冊咨送總理各國事務衙門備查至製造各項器  
械皆仿西洋新式所用工料難以例價相繩循照屆章程實用  
實銷詳請具奏前來臣復加確核委係核實動用並無絲毫浮冒  
北洋籌辦海防拱衛

奏撥搶修近省隄河經費摺

光緒十九年十二月十八日

奏為照案奏撥來年附近省城河隄歲搶修經費恭摺仰祈  
聖鑒事竊附近省城河隄歲搶修經費每年需銀三千兩奏明於  
清河道庫積存河淤地租並堡船祿夫生息項下撥發嗣因存款  
不敷復經奏准由藩庫旗租項下湊撥茲據藩司裕長清河道潘  
駿德詳稱光緒二十年前項歲搶修經費道庫仍不敷動撥但工  
程緊要關繫民生休戚勢難停辦應由藩庫旗租項下照案湊撥  
銀二千五百兩以濟要需除批飭照辦外理合繕摺具

奏伏乞

皇上聖鑒敕部查照謹

奏



永定河籌辦拋錨法片

光緒十九年十二月十八日

再永定河近年大汛盛漲險工林立防不勝防漫決頻仍勞費不可勝計前飭該河道高培因察勘拋錨護隄護埽之法茲據該道會同臬司周筱候補道張運芬勘議擬先於永定河上游河面較寬之石景山盧溝司南上北上北中北下等六汛先行試辦俟有成效下游各汛次第舉行經臣批准仿照東明成案辦法每年由練餉局籌撥銀二萬兩歸入月案報銷所需大錨已飭委員擇地趕速燒造以備臨汛拋用查錨壩係河工新法自原任東河督臣栗毓美創之於原陽繼用之於黃沁上南祥河曹河各廳無不應手奏效直境東明上汛中汛河工自光緒十六年起添拋錨壩河流亦漸順軌永定河水性與黃河無異如拋護得力此後當永遠照行庶已拋者益臻穩固未拋者陸續增多埽段可漸減少練餉

局雖甚支絀不得不移緩就急暫飭通融籌給以濟要需理合附片具陳伏乞

聖鑒敕部立案謹奏